



PATNUBAY SA MISA



31 Marso 2019

Ika-4 na Linggo ng Kuwaresma

Taon K

Ang Pag-ibig na Walang Hanggan

Tayo ay nasa Ikaapat na Linggo ng Banal na Panahon ng Kuwaresma. Ang pag-ibig ng Diyos ay walang hanggan. Ito ay walang pasubali at puno ng awa at habag. Kaya nitong magpatawad ng pinakamabigat na pagkakasala.

Sa apatnapung araw na ito ng paghahanda para sa Pagpapakasakit, Pagkamatay, at Muling Pagkabuhay ng Pa-nginoon, ipinamamalas ng Diyos ang Kanyang dakilang pag-ibig sa pamamagitan ng Kanyang walang pasubaling pagpatawad sa alibughang anak. Lakasan natin ang ating loob na lumapit sa maawaing Ama.



PASIMULA



Pambungad

(Ipahahayag lamang kung walang awiting nakahanda.)

Lunsod ng kapayapaan, magalak tayo't magdiwang. Noo'y mga nalulumbay, ngayo'y may kasaganaan sa tuwa at kasiyahan.

Pagbati

P—Ang pagpapala ng ating Panginoong Hesukristo, ang pag-ibig ng Diyos Amang puno ng pag-ibig, awa, at habag, at ang pakikipagkaisa ng Espiritu Santong nagpapabago sa ating buhay ay sumainyong lahat!

B—At sumaiyo rin!

Pagsisisi

P—Madalas tayong magkasala at mawalan ng utang na loob sa Diyos. Pagsisihan natin ang ating mga pagkakamali. (Manahimik

sandali.)

P—Para sa aming paglalayas sa tahanan ng aming Ama, Panginoon, kaawaan mo kami!

B—Panginoon, kaawaan mo kami!

P—Para sa aming pagtalikod sa kabaitan ng Diyos, Kristo, kaawaan mo kami!

B—Kristo, kaawaan mo kami!

P—Para sa aming pag-aalinlangang magbalik sa piling ng Ama, Panginoon, kaawaan mo kami!

B—Panginoon, kaawaan mo kami!

P—Kaawaan tayo ng makapangyarihang Diyos, patawarin tayo sa ating mga kasalanan, at dalhin tayo sa buhay na walang hanggan.

B—Amen!

Panalanging Pambungad

P—Ama naming makapangyarihan, ikaw ay nakikipagkasundo sa sangkatauhan sa pamamagitan ng iyong Salita. Sa masigasig

na pagsamba at matibay na pagsampalataya, ang sambayanang Kristiyano ay makadulog nawang masaya sa pagdiriwang ng dakilang kapistahan ng Pagkabuhay sa pamamagitan ni Hesukristo kasama ng Espiritu Santo magpasawalang hanggan. **B**—Amen!

PAGPAPAHAYAG NG SALITA NG DIYOS



Unang Pagbasa Jos 5:9.10-12

Ang sipi mula sa Aklat ni Josue ay naglalahad ng pagdating ng mga Israelita sa Lupang Ipinangako ng Diyos sa kanilang mga ninuno. Sa wakas ay nakauwi na sila! Ang kanilang paglalakbay, na puno ng pagsuway at pagkakasala, ay natapos na rin sa awa ng Diyos. Ang awa ng Diyos ay naghahatid ng maayos na katapusan sa lahat ng kaguluhan at pagsubok.

L—Pagpapahayag mula sa Aklat ni Josue

Noong mga araw na iyon: Sinabi ng Panginoon kay Josue: “Inalis ko ngayon ang kahihyan ng pagkaalipin ninyo sa Egipto.”

Samantalang nasa Gilgal sa kapatagan ng Jerico ang mga Israelita, ipinagdiwang nila ang Paskuwa noong hapon ng ikalabing-apat ng unang buwan. Kinaumagahan, araw pa rin ng Paskuwa, kumain sila ng mga pagkaing inani nila sa lupaing yaon: sinangag na trigo at tinapay na walang lebadura.

Pagkakain nila ng pagkaing inani sa lupaing iyon, tumigil na ang pag-ulan ng manna. Kaya’t mula nang taong iyon, pagkaing inaani sa Canaan ang kanilang ikinabuhay.

Ang Salita ng Diyos!

B—Salamat sa Diyos!

Salmong Tugunan Awit 33

B—Magsumikap tayong kamtin ang Panginoong butihin!

R. M. Velez



Magsu-mi-kap tayong kamtin ang



Pangi-noong bu---ti-hin!

* Panginoon’y aking laging pupurihin; sa pasalamat di ako titigil. Aking pupurihin kanyang mga gawa, kayong naapi, makinig, matuwa! **B.**

* Ang pagkadakila niya ay ihayag at ang ngalan niya’y purihin ng lahat! Ang aking dalangi’y dininig ng Diyos, nawala sa akin ang lahat kong takot. **B.**

* Nagalak ang aping umasa sa kanya, pagkat di nabigo ang pag-asa nila. Tumatawag sa Diyos ang walang pag-asa, sila’y iniligtas sa hirap at dusa. **B.**

Ikalawang Pagbasa 2 Cor 5: 17-21

Walang makasalanan ang hindi kayang papagbaguhin ng Diyos. Nagiging isang bagong nilalang ang nakikipag-isa kay Kristo. Sinabi nga ni San Ambrosiong ang isang masamang babaeng nakipag-isa kay Kristo ay hindi lamang nagbabago; siya

ay nagiging Birhen!

L—Pagpapahayag mula sa Ikalawang Sulat ni Apostol San Pablo sa mga taga-Corinto

Mga kapatid: Ang sinumang nakipag-isa kay Kristo ay isa nang bagong nilalang. Wala na ang dating pagkatao; siya’y bago na.

Ang Diyos ang gumawa ng lahat ng ito. Sa pamamagitan ni Kristo, ibinilang niya akong kaibigan – di na kaaway – at hinirang niya ako upang panumbalikin sa kanya ang mga tao. Ang ibig kong sabihin, ang tao’y ibinibilang ng Diyos na kanyang kaibigan sa pamamagitan ni Kristo, at nililimot na niya ang kanilang mga kasalanan. At ipinagkatiwala niya sa akin ang balitang ito.

Kaya’t ako’y sugo ni Kristo; pangrang ang Diyos na rin ang namamanhik sa inyo sa pamamagitan ko: makipagkasundo kayo sa Diyos.

Hindi nagkasala si Kristo, ngunit dahil sa atin, siya’y ibinilang na makasalanan upang makipag-isa tayo sa kanya at mapabanal sa harapan ng Diyos sa pamamagitan niya.

Ang Salita ng Diyos!

B—Salamat sa Diyos!

Awit-pambungad sa Mabuting Balita Lu 15:18

B—(Luwalhati at papuri sa iyo, Panginoong Hesukristo!)

Babalik ako sa ama, at aamuin ko siya, sasabihin ko sa kanya: “Ako po ay nagkasala sa D’yos at sa ‘yong pagsinta.” (Luwalhati at papuri sa iyo, Panginoong Hesukristo!)

Mabuting Balita Lu 15:1-3. 11-32

Ang talinghagang ikinuwento ni Hesus ay naglalarawan ng dalawang anak na nagbigay ng sama ng loob sa kanilang ama. Ang bunso ay naglayas at nagpakasama-sama. Ngunit siya ay nagsisi at nagbalik sa tahanan ng kanyang ama. Ang panganay naman ay hindi umalis ng bahay, subalit nanatiling malayo ang loob sa kanyang ama. Hindi malinaw kung ano ang kinahinatnan niya.

P—Ang Mabuting Balita ng Panginoon ayon kay San Lucas

B—Papuri sa iyo, Panginoon!

Noong panahong iyon: Ang mga

publikano at ang mga makasalanan ay nagsisilapit upang makinig kay Hesus.

Nagbulung-bulungan ang mga Pariseo at ang mga eskriba. Ang sabi nila: “Ang taong ito’y nakikisalamuha sa mga makasalanan at nakikisalo sa kanila.” Kaya’t sinabi sa kanila ni Hesus ang talinghagang ito:

“Isang tao ang may dalawang anak na lalaki. Ang wika ng bunso, ‘Ama, ibigay na po ninyo sa akin ang mamamahin ko.’ At binahagi sa kanila ng ama ang kanyang ari-arian. Pagkalipas ng ilang araw, ipinagbili ng bunso ang kanyang ari-arian at nagtungo sa malayong lupain, taglay ang buo niyang kayamanan, at doo’y nilustay na lahat sa di wastong pamumuhay. Nang malustay na niya ang kanyang kayamanan, nagkaroon ng matinding taggutom sa lupaing yaon, at nagdalita siya. Kaya’t namasukan siya sa isang mamamayan ng lupaing yaon. Siya’y pinapunta nito sa bukid upang mag-alaga ng baboy. Ibig sana niyang punan ang kanyang pagkain kahit ng mga bungang-kahoy na ipinakakain sa mga baboy ngunit walang magbigay sa kanya.

Nang mapag-isip-isip niya ang kanyang ginawa, nasabi niya sa sarili, ‘Ang mga alila ng aking ama ay may sapat na pagkain – at lumalabis pa – samantalang ako’y namamatay ng gutom dito! Babalik ako sa kanya, at sasabihin ko, ‘Ama, nagkasala po ako sa Diyos at sa inyo. Hindi na po ako karapat-dapat na tawagin ninyong anak; ibilang na lamang ninyo akong isa sa inyong mga alila.’” At tumindig siya at pumaroon sa kanyang ama.

Malayo pa’y natanawan na siya ng ama at ito’y labis na nahabag sa kanya, kaya’t patakbo siyang sina-lubong, niyakap, at hinagkan. Sinabi ng anak, ‘Ama, nagkasala po ako sa Diyos at sa inyo. Hindi na po ako karapat-dapat na tawagin ninyong anak.’ Ngunit tinawag ng ama ang kanyang mga alila, ‘Madali! Dalhin ninyo rito ang pinakamahusay na damit at isuot sa kanya. Suutan siya ng singsing at panyapak. Kunin ang pinatabang guya at patayin; kumain tayo at magsaya! Sapagkat namatay na ang anak kong ito; ngunit muling nabuhay; nawala, ngunit nasumpungan.’ At sila’y nagsaya.

Nasa bukid noon ang anak na panganay. Umuwi siya, at nang malapit na sa bahay ay narinig niya ang tugtugan at sayawan. Tinawag niya ang isa sa mga alila at tinanong: ‘Bakit? May ano sa atin?’ Dumating po ang inyong kapatid! tugon ng alila. ‘Ipinapatay ng inyong ama ang

pinatabang guya, sapagkat nagbalik siyang buhay at walang sakit.' Nagalit ang panganay at ayaw itong pumasok sa bahay. Kaya't lumabas ang kanyang ama at inamu-amo siya. Ngunit sinabi nito, 'Pinaglingkuran ko po kayo sa loob ng maraming taon, at kailanma'y hindi ko kayo sinuway. Ngunit ni minsa'y hindi ninyo ako binigyan ng kahit isang bisirong kambing para magkatuwaan kami ng aking mga kaibigan. Subalit nang dumating ang anak ninyong lumustay ng inyong kabuhayan sa masasamang babae, ipinagpatay pa ninyo ng pinatabang guya!'

Sumagot ang ama, 'Anak, lagi kitang kapiling. Ang lahat ng ari-arian ko'y sa iyo. Ngunit dapat tayong magsaya at magalak, sapagkat namatay na ang kapatid mo, ngunit muling nabuhay; nawala, ngunit nasumpungan.'

Ang Mabuting Balita ng Panginoon!

B—Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-*tao* siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-*uli*. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Hingin natin sa Diyos na tulungan tayong magsisi sa ating mga

kasalanan at magbalik-loob sa Kaniya. Ang ating sasambitin ay:

B—Amang maawain, dinggin Mo ang Iyong bayan!

* Para sa mga namumuno sa Simbahan, upang madala nila ang awa at habag ng Diyos sa mga taong umalis sa tahanan ng Ama, manalangin tayo sa Panginoon! **B.**

* Para sa lahat ng mga kabataan ng ating bayan, upang sa taong ito ng mga kabataan ay maalaala nilang sa paghahanap ng kaaliwan at mga bagong pagkakaabalahan sa buhay ay may Ama silang laging mauwian, manalangin tayo sa Panginoon! **B.**

* Para sa mga namumuno sa ating bansa, upang maging handa silang tulungan ang mga nagkakamali sa ating mga kababayang magbago at magkaroon ng pag-asa sa buhay, manalangin tayo sa Panginoon! **B.**

* Para sa mga taong nabulid sa pagpapasasa sa yaman at kaaliwan ng daigdig, upang matulungan silang makitang higit ang ligaya ng mga taong nananatili sa tahanan ng Ama, manalangin tayo sa Panginoon! **B.**

* Para sa ating lahat na nagkakati-pon sa pagdiriwang na ito, upang hindi natin ipagtabuyan ang mga taong nagkamali at malamang tayo marahil ay hindi nakababatid ng mga pamamaraan ng Diyos, manalangin tayo sa Panginoon! **B.**

* Tahimik nating ipanalangin ang ating mga pansariling kahilingan. (*Tumigil sandali.*)

Manalangin tayo! **B.**

P—Ama naming puno ng awa at habag, igawad Mo sa amin ang handog ng Banal na Espiritu upang matuto kaming umibig nang tulad Mo at masundan ang turo ng Iyong Anak na si Hesukristong aming Panginoon.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, para sa paghahaing nagbibigay-kagalangan kami ngayon ay masayang nagsisipag-alay kalakip ang dalanging amin nawang maidangal ang pagdiriwang na ito ng banal na pakikinabang at maidulot nawa ito para sa kaligtasan ng tanaan sa pamamagitan ni Hesukristo kasama ng Espiritu Santo magpawawalang hanggan.

B—Amen!

Prepasyo ng Kuwaresma II

P—Ama naming makapangyarihan, tunay ngang marapat na ikaw ay aming pasalamat na pamamagitan ni Hesukristo na aming Panginoon.

Sa pagbabakasakali mong kami'y bubuti, isinugo mo si Hesukristo upang pangunahan kami. Bilang pagsunod sa iyong atas na bigay, ipinahayag ng iyong Anak ang iyong kalooban na ang mga api't dukha ay kanyang damayan. Ngayon ay iyong inihahandog ang pagkakataong aming maisaloob ang kanyang ganap at kusang paglilingkod upang sa iyo'y lagi kaming makasunod.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinaggala ang naparirito sa ngalan ng Panginoon. Osana sa kaitaasan!

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinaabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang
(*Ipahahayag lamang kung walang awiting nakahanda.*)

Lunsod ng kapayapaan may pagkakaisang tunay, ahunan ng tanang angkan upang sambahin ang ngalan ng Panginoong Maykapal.

Panalangin Pagkapakinabang

P– Ama naming mapagmahal, tinatanglawan mo ang lahat ng tao na isinisilang sa daigdig na ito. Sa kaloob mong liwanag, tanglawan mo ang aming kalooban upang ang dapat naming isaloob na iyong ikinalulugod ay lagi naming isaisip at ikaw ay aming wagas na maibig sa pamamagitan

ni Hesukristo kasama ng Espiritu Santo magpasawalang hanggan.
B– Amen!



P– Sumainyo ang Panginoon.

B– At sumaiyo rin!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Taglayin ninyo sa inyong pag-alis ang kapayapaan ni Kristo.

B– Salamat sa Diyos!

Munting Katesismong Pangkuwaresma sa Taon ng mga Kabataan

(P. René T. Lagaya, SDB)

ANG WALANG KUPAS NA PAG-IBIG NG DIYOS

Panimula: Sa Inggles ang ii-sang salitang *love* ay ginagamit natin sa iba't ibang paraan at tumutukoy sa iba't ibang uri ng pagmamahal. Iba ang *love* para sa katipan at para sa magulang. Iba ang *love* para sa trabaho at para sa *cellphone*.

Pagpapalalim: Sa Griego ay iniiba ang salitang ginagamit batay sa uri ng pag-ibig na tinutukoy. Ang *eros* ay pag-ibig na makalaman. Ang pumupukaw dito ay ang panlabas na kagan-dahan. Ang *philia* ay pag-ibig na makatao. Ang pumupukaw dito ay ang kabutihan o kabaitan. Ang *agape* ay pag-ibig na maka-Diyos. Ang pumupukaw dito ay ang Espiritu Santo.

Pagbasa: Lucas 15:1-3.11-32

Buod: Ang *eros* ay madaling kumupas dahil sa ang panlabas na ganda ay madaling mawala. Ang *philia* ay may hangganan dahil sa ang kakayahang ng taong magmahal ay may hangganan. Ang *agape* ay walang hanggan dahil sa ang kakayahang magmahal ng Diyos ay walang hanggan.

Sa Bundok ng Horeb o Sinai, tinanong ni Moises ang Diyos kung ano ang kanyang pangalan. Ang ibinigay na pangalan ng Diyos ay *Yahweh*. Ito ay isang **pandiwa** sa pangkasalukuyang panahunan. Ang ating mga pangalan ay pangngalan o di kaya'y pang-uri. Ngunit dahil sa ang kalikasan ng Diyos ay nasa pagkilos, pandiwa ang kanyang pinili. At ang pagkilos ng Diyos ay ang umibig: "*ang Diyos ay pag-ibig*" (1 Juan 4:8b).

Dahil sa ang kapanahunan ng pandiwang ito ay pangkasalukuyan, ang pag-ibig ng Diyos ay laging **ngayon**. Hindi ito **kahapon** dahil wala itong pangnagdaan. Kahit kailan ay hindi kukupas ang pag-ibig ng Diyos. Hindi rin ito **bukas** dahil wala itong panghinaharap. Kahit kailan ay hindi mag-iiba ang pag-ibig ng Diyos. Ito ay laging malakas, marubdob, at matatag.

Ang pag-ibig ng Diyos ay nakabatay sa Kanyang sarili at hindi sa taong Kanyang minamahal. Magbago man ang tao, magpakasama-sama man siya, masadlak man siya sa pagkakasala, ay hindi pa rin mag-iiba ang pag-ibig ng Diyos.

Pagsasabuhay: Ang ating mga kabataan ay mapusok, kulang sa karanasan, at malimit na magkamali. Kailangan nila ang katiyakang lagi pa rin silang mamahalin ng mga nakatatanda sa kanila. Magagawa ito ng mga nakatatanda kapag aalalahanin lamang nilang sila rin ay nakaranas ng walang kupas na pag-ibig ng Diyos. Dapat nilang balikan ang kanilang mga sariling karanasang hindi sila ipinagtabuyan ng Diyos noong sila rin ay nagkamali at nagkasala.

Pagdiriwang: Ama naming mapagmahal, ibuhos Mo sa amin ang handog ng Iyong Banal na Espiritu upang aming malasahan ang Iyong dakila at walang kupas na pag-ibig sa amin. Maipadama nawa namin sa mga taong nakapaligid sa amin, lalo na sa mga kabataan, na matatag ang aming pagmamahal sa kanila. Tawagin Mong magbalik sa Iyong tahanan ang mga lumayo at nalihis ng landas at nang makasama sila sa Kahariang itinatag ng Iyong Anak na si Hesukristong aming Panginoon. Amen!



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• Illustrations: A. Sarmiento, B. Cleofe • Marketing: Fr. B. Nolasco • Circulation: R. Saldua